

支那  
撰述

釋迦譜

卷之九十



柳田文庫

文庫11

D62

5





文庫 11  
D 62  
5

釋迦譜卷第九

蕭 齊 釋 僧 祐 撰 誤

釋迦雙樹般涅槃記第二十七

出大般涅槃經

佛在拘尸那城力士生地阿夷羅跋提河邊娑羅雙  
樹間與大比丘衆八十億百千人俱前後圍繞二月  
十五日臨涅槃時以佛神力出大音聲乃至有頂隨  
其類音普告衆生今日如來應供正徧知憐愍衆生  
如羅睺羅爲作歸依大覺世尊將欲涅槃一切衆生  
若有所疑今悉可問爲最後問長阿含經云佛於毗  
耶離與阿難獨留於後夏安居中佛身疾生舉體皆

支那

釋迦譜卷九

二

書九

010190551623

48-12459



痛佛告阿難諸有修四神足多修習行常念不忘在意所欲可得不死一劫有餘阿難佛四神足已多如來可止一劫有餘為世除冥天人獲安爾時阿難默然不對如是再三阿難為魔之所蔽朦朦不悟佛告阿難宜知是時阿難承旨禮佛而去其間未久時魔波旬來白佛意無欲可般涅槃佛告波旬且止且止我自知時如來今者未取涅槃波旬復白佛言佛昔初成正覺我時勸請如來可般涅槃爾時如來報言須我諸弟子集化今正是時何不滅度佛言止止波旬佛自知時不久住也是後三月於本生處拘尸那

竭娑羅園雙樹間當取滅度時魔即念佛不虛言歡喜踊躍忽然不現佛即於遮波羅塔定意三昧捨命住壽當此之時地大震動人民驚怖衣毛為豎佛放太光幽冥之處莫不蒙明各得相見賢者阿難心驚毛豎疾行詣佛頭面禮足白言恠哉地動是何因緣佛告阿難凡世地動有八因緣夫地在水上水止於風風止於空空中大風有時自起則大水撓普地皆動是為一復次有時得道比丘比丘尼及大神尊天觀水性多觀地性少欲自試力故則普地動是為二菩薩降神母胎地為大動是為三菩薩從右脇生則



廣述  
承言  
普地動是爲四菩薩初成正覺則普地動是爲五初  
轉無上法輪則普地動是爲六佛教將畢欲捨性命  
則普地動是爲七如來欲入無餘涅槃界而般涅槃  
時地大震動是爲八也爾時世尊告阿難俱詣香塔  
現在比丘普勅令集如來不久是後三月當般泥洹  
諸比丘聞已皆悉愕然殞絕迷荒自投於地舉聲大  
呼一何駛哉佛取滅度宛轉號咷不能自勝佛告諸  
比丘汝等且止勿懷憂悲天地人物無生不終欲使  
有爲不變易者無有是處天魔波旬向來請我我言  
是後三月當般涅槃爾時賢者阿難右膝著地叉手

白佛言惟願世尊留住一劫勿取滅度爾時世尊默  
然不對如是三請佛告阿難汝親從佛聞佛四神足  
已多習行不忘可止不死一劫有餘多所饒益天人  
獲安汝爾時何不勸請如來使不滅度今汝方言豈  
不過耶吾已捨性命已棄已吐欲使如來自違言者  
無有是處爾時世尊於晨朝時從其面門放種種光  
徧照三千大千佛之世界乃至十方六趣衆生遇斯  
光者罪垢煩惱一切消除是諸衆生見聞是已心大  
憂惱同時舉聲悲號啼哭爾時大地諸山大海皆悉  
震動時諸衆生共相謂言當共疾往詣拘尸城勸請



如來莫般涅槃住世一劫若減一劫諸大弟子尊者  
摩訶迦梅延等遇佛光者其身戰掉不能自持發聲  
大叫生種種苦惱復有八十百千諸比丘皆阿羅漢  
如大龍王復有六十億比丘尼亦是阿羅漢各於  
晨朝日初出時舉身毛豎徧體血現如波羅奢華涕  
泣盈日生大苦惱疾至佛所稽首佛足繞百千市却  
坐一面復有一恒河沙菩薩摩訶薩位階十地日初  
出時遇佛光明徧體血現涕泣盈目疾至佛所稽首  
佛足繞百千市却坐一面復有二恒河沙諸優婆塞  
三恒河沙諸優婆夷四恒河沙毗舍離城諸離車等

五恒河沙大臣長者復有閻浮提內所有諸王復有  
七恒河沙諸王夫人唯除阿闍世王夫人所設供養  
七倍於前復有八恒河沙諸天女等九恒河沙諸龍  
王等十恒河沙諸鬼神王所設供具倍於諸龍復有  
二十恒河沙金翅鳥王三十恒河沙乾闥婆王四十  
恒河沙緊那羅王五十恒河沙摩睺羅伽王六十恒  
河沙阿修羅王七十恒河沙陀那婆王八十恒河沙  
羅刹王更不食人其形醜陋以佛神力皆悉端正復  
有九十恒河沙樹林神王千恒河沙持呪主一億恒  
河沙貪色鬼魅百億恒河沙天諸婬女千億恒河沙



地諸鬼王十萬億恒河沙諸天王及四天王等復有  
 十萬億恒河沙四方風神吹諸樹上時非時華散雙  
 樹間十萬億恒河沙主雲雨神皆作是念如來涅槃  
 焚身之時我當注雨令火時滅復有二十恒河沙太  
 香象王拔取諸妙蓮華來至佛所二十恒河沙師子  
 獸主持諸華果來至佛所二十恒河沙諸飛鳥主鳧  
 鴈鴛鴦孔雀迦陵頻伽鳥耆婆鳥持諸華果稽首佛  
 足二十恒河沙水牛主往到佛所出妙香乳其乳  
 流滿拘尸那城所有溝坑色香美味悉皆具足二十  
 恒河沙四天下中諸神仙人持諸香華甘果稽首佛

足閻浮提中一切蜂主持種種華來詣佛所復有無  
 量世界中間及閻浮提所有諸山神四大海神及諸  
 河神有大威德所設供養倍勝於前以薈婆華散尼  
 連河稽首佛足却住一面爾時拘尸那城娑羅雙樹  
 林其林變白猶如白鵠於虛空中自然而有七寶堂  
 閣雕文刻鏤流泉浴池上妙蓮華亦如忉利歡喜之  
 園是諸天人阿修羅等咸覩如來涅槃之相皆悉悲  
 感時四天主及三十三天乃至第六天所設供養展  
 轉勝前大梵天主及餘梵眾放身光明徧四天下欲  
 界人夫日月光明悉不復現持諸寶幢旛極短者懸



於梵宮至娑羅樹間稽首佛足白言唯願如來哀受我等最後供養如來知時默然不受爾時毗摩質多阿修羅王與無量大眷屬俱身諸光明勝於梵天持諸寶幢其蓋小者覆千世界上妙甘饌來詣佛所欲界魔王波旬與其眷屬諸天姝女阿僧祇眾開地獄門施清淨水因而告曰汝等今者無所能為唯當專念如來功德當令汝等長夜獲安時魔波旬於地獄中悉除刀劍無量苦毒熾然燄火注雨滅之以佛神力令諸眷屬皆捨刀劍弓弩矛稍長鉤鬪輪絹索所持供養倍勝一切人天所設其蓋小者覆中千界來

至佛所稽首佛足唯願如來哀受我等最後供養如是三請皆亦不受時魔波旬不果所願心懷愁惱却住一面爾時大自在天王與其眷屬無量無邊及諸天眾所設供具悉覆梵釋人天八部所有供具梵釋所設猶如聚墨在珂貝邊悉不復現寶蓋小者能覆三千大千世界來詣佛所稽首佛足繞無數而爾時東方去此無數阿僧祇恒河沙微塵世界彼有佛土名意樂美音佛號虛空等如來十號具足爾時彼佛告第一大弟子言汝今宜往西方娑婆世界釋迦牟尼如來彼佛不久當般涅槃汝可持此世界香飯奉



獻彼佛世尊食已入般涅槃爾時無邊身菩薩即受  
 佛教稽首佛足發彼國來應時此間三千大千世界  
 大地六種震動梵釋四主魔王波旬摩醯首羅見是  
 地動舉身毛豎喉舌枯燥驚怖戰慄各欲四散自見  
 其身無復光明是時文殊師利即從座起告諸大眾  
 汝等勿懼東方去此無量阿僧祇恒河沙微塵等世  
 界有佛號虛空等如來十號具足彼有菩薩名無邊  
 身與無量菩薩欲來至此供養如來以彼菩薩威德  
 力故令汝身光悉不復現爾時大眾悉皆遙見彼佛  
 如明鏡中自觀已身見無邊身菩薩一一毛孔各各

出生一大蓮華各有七萬八千城邑七寶雜廁是中  
 衆生不聞餘名純聞無上大乘之聲書持讀誦大乘  
 經典一切大眾悉皆得見無邊身菩薩身大無邊量  
 同虛空唯除諸佛更無能見是菩薩身身量邊際時  
 無邊身菩薩稽首佛足合掌白言世尊唯願哀愍受  
 我等食如來知時默然不受南北西方諸佛世界亦  
 有無量無邊身菩薩所持供養倍勝於前時娑羅雙  
 樹吉祥福地縱廣三十二由旬大眾充滿間無空缺  
 爾時四方無邊身菩薩及其眷屬所坐之處或如錐  
 頭鍼鋒十方如微塵世界諸大菩薩悉來集會唯除



尊者摩訶迦葉阿難二衆阿闍世王及其眷屬乃至  
毒蛇視能殺人蝘蝓及十六種行惡業者一切  
來集陀那婆神阿脩羅等悉捨惡念皆生慈心除一  
闍提爾時三千大千世界以佛神力地皆柔輭衆寶  
莊嚴猶如西方無量壽佛極樂世界是時大衆悉見  
十方微塵等諸佛世界如於明鏡自觀已身爾時如  
來面門所出五色光明其光明耀覆諸大會令彼身  
光悉不復現所應作已還從口入時諸天人阿脩羅  
等見佛光明還從口入皆大恐怖身毛爲豎復作是  
言如來光明出已還入必於十方所作已辦將是最

後涅槃之相嗚呼痛哉世間大苦悲號啼哭不能自  
持爾時會中有優婆塞是拘尸城工巧之子名曰純  
陀與其同類十五人俱從座而起偏袒右肩右膝著  
地合掌向佛悲感流淚頂禮佛足白佛言唯願世尊  
及比丘僧哀受我等最後供養我等從今無主無親  
無救無護貧窮饑困欲從如來求將來食唯願哀受  
我等微供然後涅槃爾時世尊一切種智告純陀曰  
善哉善哉我今爲汝除斷貧窮無上法雨雨汝身由  
令生法芽乃令汝具足檀波羅蜜爾時大衆歡喜踊  
躍同聲讚言善哉善哉希有純陀佛已受汝最後供



養汝今純陀真是佛子佛告純陀汝所奉施佛及大  
 衆今正是時如來正爾當般涅槃第二第三亦復如  
 是爾時純陀聞佛語已舉聲號哭復白大衆我等今  
 者一切當共五體投地同聲勸佛莫般涅槃佛告純  
 陀莫大啼哭自亂其心我以哀愍汝及一切是故今  
 日欲入涅槃何以故諸佛法爾有爲亦然速辦所施  
 不宜久停爾時世尊從其面門放種種色青黃赤白  
 紅紫光明照純陀身純陀遇已與諸眷屬持諸餽饌  
 疾往佛所憂悲悵快重白佛言唯願如來猶見哀愍  
 住壽一劫佛告純陀汝欲令我久住世者宜當速奉

最後具足檀波羅蜜爾時一切菩薩天人雜類異口  
 同音唱言奇哉純陀成大福德我等無福所設供具  
 則爲唐捐爾時世尊欲令一切衆望滿足於自身上  
 一一毛孔有無量佛一一諸佛各有無量諸比丘僧  
 悉皆示現受其供養釋迦如來自受純陀所奉設者  
 爾時純陀所持粳糧成熟之食摩伽陀國滿足八斛  
 以佛神力皆悉充足一切大會長阿含經云世尊與  
 諸大衆至波婆城闍頭園中時有工師子名曰周那  
 卽自嚴服至世尊所頭面禮足卽請世尊明日舍食  
 時佛默然受請明日時到爾時世尊法服持鉢大衆



圍繞往詣其舍周那尋設飯食供佛及僧別煮栴檀  
 樹耳世所奇珍獨奉世尊佛漸為說法示教利喜已  
 大眾圍繞侍從而還中路止一樹下告阿難言吾患  
 背痛汝可敷座阿難白佛言周那設供無有福利所  
 以者何如來最後於其舍食便取涅槃佛告阿難勿  
 作是言周那為獲大利得壽命得色得力所以者何  
 佛初成道能施食者佛臨滅度能施食者此二功德  
 正等無異雙卷大般泥洹經云佛語賢者阿難俱之  
 波旬國弟子皆行到止城外禪頭園中波旬豪姓有  
 諸華氏聞佛來到皆出作禮稽首畢一面坐有華氏

子淳獨留長跪白佛欲設微食願與聖眾俱屈威神  
 佛默然如可之淳喜為禮而歸而調作膳美晨施牀  
 座佛與眾弟子俱到其舍就高座淳手自斟酌奉鉢  
 致漿供養行澡水畢佛說法已淳歡喜佛語阿難俱  
 之拘夷邑行半道所佛疾生身背痛止樹下坐於是  
 佛語賢者阿難至熙連河自澡浴已告阿難朝從華  
 子淳飯夜當滅度天下有二難一為若施飯食成無  
 上真道為至聖佛二為若施飯食棄所受餘無為之  
 情而滅度今淳飯佛當得長壽得受無欲得大福德  
 極貴得官屬終生天上獲此五福語淳勿憂宜用歡

支那

釋迦譜卷九

九

書九



喜祐尋此二經與大般涅槃所說純陀最後供養多有不同此大小乘經現化之各見殊也爾時樹林其地陝小以佛神力如針鋒處皆有無量諸佛世尊所食之物亦無差別是時天人阿脩羅等啼泣悲歎如來今日已受我等最後供養當般涅槃我等當復更供養誰爾時世尊爲欲安慰一切大衆而說偈言若不能如是觀了三寶常者是旃陀羅若有能知三法常住實法因緣離苦安樂時諸人天大衆阿脩羅等聞是法已心生歡喜踊躍無量知佛常住散種種華鼓天妓樂爾時世尊與文殊師利迦葉菩薩及與

純陀受記別已作如是言諸善男子自修其心慎莫放逸我今背疾舉體背痛我今欲臥如彼小兒及常患者文殊汝等當爲四部廣說大法今以此法付囑於汝乃至迦葉阿難等來當復付囑爾時如來說是語已爲欲調伏諸衆生故現身有疾右脇而臥如彼病人長阿含經云爾時世尊入拘尸城向本生處末羅雙樹間告阿難曰汝爲如來於雙樹間敷置牀座使頭北首面向西方所以然者吾法流布當久住北方爾時世尊自四裝僧伽梨偃右脇如師子王累足而臥時雙樹間鬼神以非時華布散于地阿難長跪



叉手而白佛言莫於此鄙陋小城荒毀之土取滅度也更有大國迦維羅衛國波羅奈國民人衆多必能恭敬供養舍利佛言止止無謂此土以為鄙陋昔者此國土有王名大善見七寶具足王有四德主四天下善見命終生第七梵天其王死七日後輪寶珠寶自然不現象寶馬寶居士寶主兵寶同日命終城池法殿金多羅園變為土石有法無常要歸摩滅唯得聖道爾乃知之我自憶念曾於此處六反作轉輪聖王終厝骨於此今我成無上正覺復捨性命厝身於此自今已後生死永終無有方土厝吾身處此最後

邊夏不受有

爾時迦葉菩薩白佛言世尊如來已免一切諸病苦患悉除無復怖畏世尊一切衆生有四毒箭則為病因何等為四貪欲瞋恚愚癡憍慢若有病因則有病人所謂愛熱肺病上氣吐逆膚體瘡瘡其心悶亂下痢噓噎小便淋瀝眼耳疼痛背滿腹脹顛狂乾瘠鬼魅所著如是種種身心諸病諸佛世尊悉無復有今日如來何緣顧命文殊師利而作是言我今背痛汝等當為大衆說法有二因緣則無病苦何等為二一者憐愍一切衆生二者給施病者醫藥如來往昔已



於無量萬億劫中修菩薩道常行愛語利益眾生不  
 令苦惱施疾病者種種醫藥何緣於今自言有病世  
 尊世有病人或坐或起不安其所或索飲食戒勅家  
 屬修治產業何故如來默然而臥不教弟子聲聞人  
 等尸波羅蜜諸禪解脫三摩跋提修諸正勤何緣不  
 說如是甚深大乘經典如來何故不以無量方便教  
 大迦葉人中象王諸天人等令不退於阿耨多羅三  
 藐三菩提何故不治諸惡比丘受畜一切不淨物者  
 世尊實無有病云何默然右脇而臥一切愚人生滅  
 盡種當為外道九十五種之所輕慢沙門瞿曇無常

所遷如來世尊無上仙人已拔毒箭得無所畏今者  
 何故右脇而臥令諸人天悲愁苦惱爾時世尊大悲  
 熏心知諸眾生各各所念將欲隨順畢竟利益即從  
 臥起結加趺坐顏貌熙怡如融金聚放大光明充徧  
 虛空其光大盛過百千日照于東方南西北方四維  
 上下諸佛世界於其身上一一毛孔出一蓮華各具  
 千葉純真金色各出種種雜色光明皆悉徧至阿鼻  
 地獄想地獄黑繩地獄眾合地獄叫喚地獄大叫喚  
 地獄焦熱地獄大焦熱地獄是八地獄其中眾生常  
 為諸苦之所逼切所謂燒煮火炙斫刺剝剥乃至八



種寒冰地獄所謂孽裂身體碎壞遇斯光已如是等  
 苦悉滅無餘是光明中言諸眾生皆有佛性眾生聞  
 已即便命終生人天中此閻浮提及餘世界所有地  
 獄皆悉虛空無受罪者除一闍提餓鬼眾生饑渴所  
 逼以髮纏身於百千歲未曾得聞漿水之名遇斯光  
 已饑渴即除是光明中亦說眾生皆有佛性聞已命  
 終生天人中令諸餓鬼亦悉空虛除謗大乘畜生眾  
 生共相殘食遇斯光已恚心悉滅是光明中亦說眾  
 生皆有佛性聞已命終生人天中當爾之時畜生亦  
 盡除謗正法是一一華各有一佛圓光一尋端嚴最

上是諸世尊或震雷音或注洪雨或扇大風或出烟  
 燄或有示現初生出家轉妙法輪入于涅槃此閻浮  
 提中所有眾生遇斯光已盲者見色聾者聽聲瘖言  
 覺行貧者得財慳者能施恚者慈心不信者信無一  
 眾修行惡法除一闍提爾時一切天龍鬼神乾闥  
 婆阿脩羅及人非人等悉共同聲唱如是言善哉善  
 哉無上天尊多所利益踊躍歡喜或歌或舞或身動  
 轉以種種華散佛及僧諸天妓樂供養於佛爾時佛  
 告迦葉菩薩是諸眾生不知大乘方等密語便謂如  
 來真實有疾如來今於娑羅樹間示現倚臥師子之



林欲入涅槃令諸未得阿羅漢果眾弟子等及諸力士生大憂苦令諸天人阿脩羅等大設供養欲使諸人以千端氈纏裹其身七寶為棺盛滿香油積諸香木以火焚之唯除二端不可得燒一者襯身二最在外為諸眾生分散舍利以為八分一切聲聞弟子咸言如來入於涅槃當知如來亦不畢定入於涅槃何以故如來常住不變易故長阿含經云爾時世尊即記荊千二百弟子所得道果世尊披鬱多羅僧出金色臂告諸比丘汝等當觀如來時時出現於世如優曇華時一現耳

雙卷大般泥洹經云佛語阿難甚已願樂如來正化當棄貪欲憍慢之心遵承佛教以精進受思惟道行是為最後佛之遺令必共慎之汝諸比丘觀佛之儀容難可得觀却後一億四千餘歲乃當復有彌勒佛耳難常遇也天下有優曇鉢華不華而實若其生華則世有佛為世間日恒除眾暝自我為聖師至七十九所應作者亦已究暢汝其勉之夜已半矣是故比丘無為放逸我以不放逸故自致正覺無量眾善亦由不放逸得一切萬物無常存者此是如來末後所說於是世尊即入初禪從初禪起入第二禪從第二



禪起入第三禪從第三禪起入第四禪從四禪起入  
 空處定從空處定起入識處定從識處定起入不用  
 定從不用定起入有想無想定從有想無想定起入  
 滅想定是時阿難問阿那律世尊已般涅槃耶那律  
 言未也阿難世尊今者在滅想定我昔親從佛聞從  
 四禪起乃般涅槃於時世尊從滅想定起入有想無  
 想定從有想無想定起入不用定從不用定起入識  
 處定從識處定起入空處定從空處定起入第四禪  
 從第四禪起入第三禪從第三禪起入第二禪從第  
 二禪起入第一禪從第一禪起入第二禪從第二禪

起入第三禪從第三禪起入第四禪從第四禪起佛  
 般涅槃當於爾時地大震動諸天世人皆大驚怖諸  
 有幽冥日月光明所不照處皆蒙大明各得相見迭  
 相謂言彼人生此其光普徧過諸天光明時忉利天  
 於虛空中以文陀羅華優鉢羅波頭摩華等散如來  
 上及散眾會又以天末栴檀雨散佛上及散大眾佛  
 滅度已時梵天王釋提桓因金毗羅神密迹力士佛  
 母摩耶雙樹神娑羅園林神四天王忉利天主欲摩  
 天王兜率陀天主化自在天主他化自在天主各作  
 偈頌諸比丘悲慟殞絕自投於地譬如斬蛇宛轉迴



遑莫知所湊歎歎而言如來滅度何其駛哉大法淪  
 翳何其速哉羣生長衰世間眼滅爾時阿那律告諸  
 比丘止止勿悲諸天在上儻有恠責時諸比丘問阿  
 那律上有幾天阿那律言充滿虛空豈可計量皆於  
 空中徘徊搔擾悲號躡躡垂淚而言如來滅度何其  
 駛哉羣生長衰世間眼滅雙卷大般泥洹經說與長阿含說略同  
 時諸比丘竟夜達曉講法語已阿那律告阿難言汝  
 可入城語諸末羅佛已滅度所欲施作宜及時為是  
 時阿難起禮佛足已將一比丘涕泣入城遙見五百  
 末羅集在一處諸末羅奉迎禮足白言今來何早阿

難答言汝等當知如來昨夜已取滅度汝欲施作宜  
 及時為諸末羅聞是語已莫不悲慟捫淚而言一何  
 駛哉佛般涅槃一何疾哉世間眼滅時諸末羅各自  
 還家辦諸香華及眾妓樂詣雙樹間供養舍利竟一  
 日已以佛舍利置於牀上諸末羅童子等來輦舉牀  
 皆不能勝時阿那律語末羅汝等且止勿空疲勞今  
 者諸天欲來舉牀汝等欲使末羅童子舉牀四角入  
 東城門徧諸里巷使國人民皆得供養然後出西城  
 門詣高顯處而闍維之而諸天意欲留舍利七日之  
 中使國人民皆得供養然後出城北門渡熙連禪河



於天冠寺中而闍維之。是上天意使牀不動。末羅曰：諾快哉！斯言隨諸天意。時諸末羅即共入城。平治道路，掃灑燒香。已出雙樹間，以香華妓樂供養舍利。訖七日巳時，日向暮，舉佛舍利置於牀上。末羅童子捧舉四角，擎持旛蓋，燒香散華，作眾妓樂，前後導從。安詳而行。時忉利諸天、雨、文陀羅華、優鉢羅華等，天末梅檀散舍利，上充滿街路。諸天作樂，鬼神歌詠供養舍利。於是末羅捧牀，漸進入東城門，止諸街巷，設供養。已出城北門，渡熙連禪河，到天冠寺，告阿難曰：我等復應以何供養阿難報？曰：我親從佛聞欲葬舍利。

當如轉輪聖王葬法，生獲福利，死得上天。時諸末羅即共入城，供辦葬具。已還到天冠寺，以淨香湯洗浴佛身，以新劫貝周巾纏身，五百張氎次如纏之內身。金棺灌以香油，置於第二大鐵槨中。梅檀木槨重衣，其外以眾名香而積其上。末羅大臣名曰路幾，親執炬火，欲然佛積，而火不然。又諸末羅次前，然積火，又不然。時阿那律語末羅言：止！止！諸賢，非汝所能。火滅不然，是諸天意。以大迦葉將五百弟子，從波波國來，欲見佛身。天知其意，使火不然。爾時大迦葉從波波國遇一尼乾子，手執文陀羅華，問言：汝知我師在乎？



答曰滅度已來已經七日迦葉聞之悵然不悅五百比丘宛轉號咷不能自勝迦葉詣拘尸城渡尼連禪河到天冠寺至阿難所語阿難言我等欲一而觀舍利及未闍維寧可見不阿難答言雖未闍維以劫貝五百張氈次如纏之藏於金棺置鐵槨中以為佛身難復可觀迦葉三請阿難答之如初時大迦葉適向香積於時佛身從重棺內雙出兩足足有異色迦葉見已怪問阿難佛身金色是何故異阿難報曰向有一老母悲哀而前淚墮其上故色異耳迦葉即向香積禮佛舍利時四部眾及上諸天同時俱禮於是佛

足忽然不現時大迦葉繞積三市而作偈頌時彼佛積不燒自然諸末羅等各相謂言今火獨熾燄盛難止闍維舍利或能燒盡當於何所求永滅之時有娑羅樹神尋以神力滅佛積火時諸末羅詣拘尸城側取諸香華以用供養雙卷大般泥洹經說與長阿合說略同又云大迦葉至於是佛積不燒自然至終其夜佛積燒盡自然生四樹蘇尼禪樹迦維屠樹阿世鞞樹尼拘類樹菩薩處胎經云佛在雙樹欲捨身壽入般涅槃二月八日夜半躬自裝僧伽梨鬱多羅僧安陀羅跋薩各三條敷金棺裏襯身臥上脚脚相累以鉢錫



杖手付阿難八大國王皆持五百張白氎栴檀木椽  
 蓋內金棺裏大梵天王將諸梵眾在右面立釋提桓  
 因將忉利諸天在左面立彌勒菩薩十方菩薩當前  
 立爾時世尊欲入金剛三昧碎身舍利從金棺裏出  
 金色臂即問阿難迦葉比丘今來至不對曰未至即  
 復斂氎入金棺裏寂然不語世尊將欲示現識所趣  
 向道識俗識有為識無為識世尊即於胎中現鉤鎖  
 胎骨偏滿三千大千世界佛告彌勒汝觀鉤鎖骸骨  
 令一切眾所知識所趣分別決了彌勒菩薩即從座  
 起手執金剛七寶神杖撓鉤鎖骨聽彼骨聲即白佛

言此人命終曠悲結多識墮龍中此人前身十跡行  
 其得生天上有一全身舍利無有缺減彌勒以杖撓  
 之推尋此識了不知處如是三撓前白佛言此人神  
 識了不可知將非如來入涅槃耶佛告彌勒諸佛舍  
 利流布非汝等境界所能分別何以故此舍利者即  
 是吾舍利何能尋究如來神識又世尊還攝威神在  
 金棺裏寂然無聲諸天燒香散華供養時大迦葉將  
 五百弟子至世尊以天耳聞即從金棺雙出兩足摩  
 耶經云佛般涅槃摩耶夫人天上五衰相現一者頭  
 上華萎二者腋下汗出三者項中光滅四者兩目數



瞬五者不樂本座又於其夜得五大惡夢一須彌山崩四海水竭二羅刹奔走挑人眼目三天失寶冠身無光明四寶珠幢倒失如意珠五師子嚙身痛如刀割得此夢已即便驚寤此非吉祥我昔在於白淨王宮因晝寢中得希有夢見一天子身黃金色乘白象王從諸天子作妙妓樂貫日之精人我右脇心身安樂即便懷妊悉達太子爲世照明今此五夢甚可怖畏必是我子涅槃之相爾時阿那律棺殯如來身已卽昇忉利天偈告摩耶摩耶聞已悶絕躡地良久乃甦自拔頭髮悲泣而言昨夜得夢知有怪異佛果滅

度不久便當卽就閻維何其苦哉世間眼滅卽與諸眷屬從空來下趣雙樹間遙見佛棺便卽悶絕不能自勝以水灑面然後方甦前至棺所頂禮悲泣而作是言共於過去無量劫來長爲母子未曾捨離一但於今相見無期嗚呼苦哉衆生福盡卽以種種天華布散棺上摩耶夫人顧見如來僧伽黎衣及鉢錫杖右手執之舉身投地如太山崩悲號慟絕而作是言我子執者福度天人今此諸物空無有主嗚呼痛哉四衆悲感淚下如雨帝釋力故變成河流爾時世尊以神力故令諸棺蓋皆自開發便從棺中合掌而起



如師子王初出窟已奮迅之勢身毛孔中放千光明  
 一一光明有千化佛悉皆合掌向於摩耶以梵輓音  
 問訊母言遠屈來下此閻浮提諸行法爾願勿啼泣  
 爾時阿難見佛起已又聞說偈垂淚嗚咽強自抑忍  
 即便白佛後世衆生必當問我佛臨滅度復何所說  
 云何答之佛告阿難汝當答言世尊已入涅槃摩耶  
 夫人來下如來為後不孝諸衆生故從金棺出合掌  
 問訊并說上諸偈故此經名為佛臨涅槃母子相見  
 經如是受持說此語已與母辭別即便闔棺三千世  
 界普皆震動八部大衆悲號懊惱聲動天地摩耶夫

人問阿難言我子悉達臨滅度時有何教勅阿難白  
 言世尊中夜為諸比丘略說教誡又以所說十二部  
 經付囑尊者摩訶迦葉末後勅我令助宣布時摩訶  
 摩耶聞此語已又增感絕即問阿難汝於往昔侍佛  
 已來聞世尊說如來正法幾時當滅阿難垂淚而使  
 答言我於往昔曾聞世尊說於當來法滅之事云佛  
 涅槃後摩訶迦葉共阿難結集法藏事悉畢已摩訶  
 迦葉於狼跡山入滅盡定我亦當得果證次第隨後  
 入般涅槃當以正法付優波掘多善說法要如富樓  
 那廣度人衆又復勸化阿輸迦王令於佛法得固正



信以佛舍利廣起八萬四千諸塔二百歲已尸羅難陀比丘善說法要於閻浮提度十二億人三百歲已青蓮華眼比丘善說法要度半億人四百歲已牛口比丘善說法要度一萬人五百歲已寶夫比丘善說法要度二萬人八萬眾生發阿耨多羅三藐三菩提心正法於此便就盡滅六百歲已九十六種諸外道等邪見競興破滅佛法有一比丘名曰馬鳴善說法要降伏一切諸外道輩七百歲已有一比丘名曰龍樹善說法要滅邪見幢然正法炬八百歲後諸比丘等樂好衣服縱逸嬉戲百千人中或有一兩得道果

者九百歲已奴為沙門婢為比丘尼一千歲已諸比丘等聞不淨觀阿那波那瞋恚不欲無量比丘若一若兩思惟正受千一百歲已諸比丘等如世俗人嫁娶行媒於大眾中毀謗毗尼千二百歲已諸比丘及比丘尼作非梵行若有子息男為比丘女為比丘尼千三百歲已袈裟變白不受染色千四百歲已時諸四眾猶如獵師好樂殺生賣三寶物千五百歲俱睽彌國有三藏比丘善說法要徒眾五百人有一羅漢比丘善持戒行徒眾五百於十五日布薩之時羅漢比丘昇於高座說清淨法云此所應作此不應作彼



三藏比丘弟子答羅漢云汝今身口自不清淨云何而反說是麤言羅漢答言我久清淨身口意業無諸過患三藏弟子聞此語已倍更恚忿即於座上殺彼羅漢時羅漢弟子而作此言我師所說會於法理云何汝等害我和尚即以利刀殺彼三藏天龍八部莫不憂惱惡魔波旬及外道眾踊躍歡喜競破塔寺殺害比丘一切經藏皆悉流移至鳩尸那竭國阿耨達龍王悉持入海於是佛法而滅盡也時摩訶摩耶聞此語已號哭懊惱語阿難言如來遺勅既以正法付屬尊者及摩訶迦葉宜應精勤護持誦讀我今不忍

見於如來闍維之時即禮佛棺右繞十匝涕淚號叫還歸天上祐敬惟涅槃義總八味古今講論精理已備妄率愚管略言其跡夫常住至寂畢竟無為但機感所誘隨方應俗既曰現生焉得無滅斯則羣萌覩於始終而法身無出沒也是以假言背痛而方轉甘露託臥右脇而還放光明此無病之跡也及千氎既纏而示雙足於迦葉金棺將闔而起合掌於摩耶此無滅之徵也無病而示病不滅而現滅故知灰身顯權常住真實月喻妙旨不其明乎

釋迦八國分舍利記第二十八 出雙卷泥洹經



時波波國末羅民衆聞佛於雙樹滅度皆自念言今我宜往求舍利分起塔供養時波波國諸末羅等即下國中嚴四種兵象兵馬兵車兵步兵到拘尸城遣使者言聞佛衆祐止此滅度彼亦我師敬慕之心來請骨分當於本國起塔供養拘尸王答如是如是誠如君言但世尊垂降此土於茲滅度國內士民當自供養遠勞諸君分舍利分恐不可得時遮羅頗國諸跋離民衆及羅摩伽國拘利民衆毗留提國婆羅門衆迦維衛國釋種民衆毗舍離國離車民衆及摩竭國阿闍世王聞於如來在拘尸那城娑羅雙樹間而

取滅度皆自念言今我宜往取舍利分時諸國王阿闍世等即下國中嚴四種兵進度恒水即勅婆羅門香姓汝持我名入拘尸城致問諸末羅等起居輕利遊步強耶吾於諸賢每相宗敬隣國義和曾無諍訟我聞如來於君國內而取滅度唯無上尊實我所天故從遠來求請骨分欲還本土起塔供養設與我者舉國重寶與君共之時香姓婆羅門受王教已即詣彼城語諸末羅時諸末羅報香姓曰誠如君言但爲世尊垂降此土於茲滅度國內士民自當供養遠勞諸君分舍利分定不可得時諸國王即集羣臣衆共



立議作頌告曰吾等和議遠來拜首遜言求分如不見與四兵在此不惜身命義而弗獲當以力取時拘尸國即集臣眾共立議以徧答曰遠勞諸君屈辱拜首如來遺形不敢相許彼欲舉兵吾斯亦有畢命相抵未云有畏時香姓婆羅門曉眾人曰諸賢長夜受佛教戒口誦法言一切眾生常念欲安寧可諍佛舍利共相殘害如來遺形欲以廣益舍利現在但當分耳眾咸稱善尋復議言誰堪分者皆曰香姓婆羅門仁智平均可使分也時諸國王即命香姓汝為我等分佛舍利均作八分於時香姓即詣舍利所頭面禮

畢徐前取佛上牙別置一面尋遣使者齎佛上牙詣阿闍世所語使者言汝以我聲上白大王起居輕利遊步強耶舍利未至傾遲無量耶今付使者如來上牙金可供養以慰企望明星出時分舍利訖當自奉送爾時香姓以一餅受一石許即分舍利均為八分已告眾人言願以此餅眾議見與自欲於舍起塔供養皆言智哉是為知時即共聽與時有畢鉢村人白眾人言乞地焦炭起塔供養皆言與之爾時拘尸國人得舍利分即於其上起塔供養波波國遮羅國羅摩伽國毗留提國迦維衛國毗舍離國摩竭國阿闍



世王等得舍利分各歸其國起塔供養香姓婆羅門  
 持餅歸起塔畢鉢村人持地焦炭歸起塔當於爾時  
 如來舍利起於八塔第九餅塔第十炭塔第十一生  
 時髮塔何等時佛生沸星出時生沸星出出家沸星  
 出成道沸星出滅度八日如來生八日佛出家八日  
 成菩提八日取滅度二月如來生二月佛出家二月  
 成菩提二月取涅槃  
 雙卷大般涅槃經云時波旬國諸華氏可樂國諸拘  
 鄰有行國諸滿離神州國諸梵志維耶國諸離昌聞  
 佛止雙樹般泥洹各嚴四兵到拘夷止城外赤澤國

諸釋氏亦嚴四兵來到報言釋聖大雄出自我親實  
 我諸父敬慕之心來請骨分摩竭王阿闍世又嚴四  
 兵度河津來使梵志屯蹙入問消息今佛眾祐止此  
 滅度實我所天敬慕之心來請骨分王答佛自來此  
 我當供養謝汝大王舍利不可得於是屯蹙聚眾  
 人作頌告曰今各遠來四兵在此義言不用畢命相  
 抵拘夷國人亦答頌曰如欲舉眾吾斯亦有俱命相  
 抵則未為恐梵志屯蹙曉眾入言諸君皆宿夜承佛  
 嚴教佛大慈故燒形遺骨欲廣祐天下何宜當為毀  
 本慧意舍利現在但當分耳眾咸稱善皆詣舍利稽



首畢乃使屯魔分之於是屯魔持一罌受一石許蜜塗其裏分爲八分已白眾言吾既敬佛願得著罌舍利歸起塔廟皆言智哉即共聽與梵志温達乞地焦炭歸起塔寺皆言與之後有衡國異道士求得地灰於是八國得佛八分舍利各還起塔有八塔第九罌塔第十灰塔第十一炭塔既分舍利又爲遠方諸四輩弟子未悉聞故留九十日乃去城四十里於衛致鄉四衢道中作塔寺拘夷豪姓共作甌瓦石甃縱廣三尺集用作塔及高縱廣皆丈五尺藏黃金罌舍利於其中置立長表法輪盤蓋懸繒然燈華香妓樂禮

事供養祐以爲雙樹八枝義各有明舍利八分緣亦有會故蛻化之體或全或散用能留瑞羣刹降福於人天夫不生而假胎無形而委骨其示跡垂教即不思議之事也

釋迦天上龍宮舍利寶塔記第二十九

出菩薩處胎經

有一大臣名優波吉諫言諸王莫諍佛舍利應當分之普共供養何爲與兵共相征伐爾時釋提桓因即現爲人語諸王言我等諸天亦當有分若共諍力則有勝負幸可見與勿足爲難爾時阿耨達龍王文隣龍王伊那鉢龍王語八王言我等亦應有舍利分若



不見與力足相伏時優波吉言諸君且止舍利宜共  
 分之即分為三分一分與諸天一分與龍王一分與  
 八王一分龕受石餘此臣密以蜜塗龕裏以龕量分  
 舍利諸天得舍利還於天上即起七寶塔龍得舍利  
 還於龍宮亦起七寶塔八王得舍利各還本國亦起  
 七寶塔臣優波吉得著龕舍利并龕亦起七寶塔灰  
 及土四十九斛起四十九寶塔當耶維處亦起寶塔  
 高四十九仞

釋迦龍宮佛髭塔記第三十

出阿育王經

八國王競諍取舍利各各起兵天帝釋見之即遣天

邊自下曉喻諸王言佛在世時諸王皆如兄弟佛適  
 泥洹云何相伐橫殺萬民當共分之各還起塔普皆  
 得福諸王皆言快哉持卿作評為我分之得無諍也  
 邊自以金鬘分之阿闍世王共數各得八萬四千舍  
 利餘有佛口一髭無敢取者以阿闍世王初來求舍  
 利時車中投身著地氣欲不報故共持與阿闍世王  
 阿闍世王得舍利及髭還大歡喜作倡妓樂鼓角動  
 天難頭和龍王聞佛般泥洹亦從諸龍化作人身到  
 泥洹所道逢阿闍世王還語言佛留舍利非但唯使  
 人間供養可持一分見與不阿闍世言不可得也龍



王言我是難頭和龍能舉卿國土著八萬里外摩碎成屑阿闍世王怖懍故即舉佛髭與之更復欲取舍利龍王便言我得此髭足供養也旋別各去龍王即還須彌山下起水高八萬四千里起水精瑠璃塔阿闍世王命終後阿育王得其國土時有大臣白阿育王言難頭和龍王先輕阿闍世奪佛髭去阿育王聞便大瞋恚即勅諸鬼神王作鐵網鐵藉縱置須彌山下水中欲縛取龍王龍王大怖共設計言阿育事佛當伺其臥取其宮殿移著須彌山水精塔中自與相見具說本末道意降伏其瞋必息即便遣龍捧取

阿育王宮殿阿育王臥覺不知是何處所見水精塔高八萬四千里喜怖交心難頭和龍自出謝言阿闍世王自與我佛髭我不奪也釋迦文佛在世與我要言般泥洹後劫盡時所有經戒及袈裟應器我皆當取藏著是塔中彌勒來下當復出著阿育王聞此言大謝實不知此難頭和龍王便使諸龍還復阿育王宮殿置於本處祐以為能供三寶本在天人故忉利閻浮塔廟森列至於難頭龍王乃太士應化所以法滅之時收藏尊經其能建刹不亦宜乎

釋迦譜卷第九







我滅度百年之後此童子於巴連弗邑統領一天下  
轉輪王姓孔雀名阿育正法治化又復廣布我舍利  
當造八萬四千塔阿難取此鉢中所施之沙捨著如  
來經行處當行彼處阿難受教即取鉢沙泥著經行  
處阿難當知於巴連弗邑有王名日月護彼王當生  
子名曰頻頭婆羅當治彼國彼復有子名曰修師摩  
時瞻婆國有一婆羅門女極為端正令人樂見為國  
所珍諸相師輩見彼女相即記彼女當為王妃必生  
二子一當領天下一當出家學道得成聖跡時婆羅  
門聞相師所說歡喜無量即持其女詣巴連弗邑種

種莊嚴欲嫁與修師摩王子相師云應嫁與頻頭婆  
羅王王見此女端正有德即立為第一夫人恒相娛  
樂仍便懷體月滿生子生時安隱母無憂惱過七日  
後立字名無憂又復生子名曰離憂無憂者身體羸  
澀父不喜見王欲試諸子呼婆羅門言觀我諸子於  
我滅後誰當作王婆羅門言將此諸子出城金殿園  
館中當觀其相時阿育王母語阿育言今王出金殿  
園館中觀諸王子於我滅後誰當作王汝何不去阿  
育啓言既不蒙念亦復不樂見我母言但往即便往  
去願母賜送食母言如是王先勅大臣若阿育來者



當使其乘老鈍象來又復老人以為眷屬時阿育王  
 即乘老象至園館中地坐時諸王子各下飲食阿育  
 母以瓦器盛酪飯送與阿育王問師言此中誰有王  
 相當紹我位時彼相師視諸王子見阿育具有王相  
 當得紹位又作是念此阿育大主所不愛我若語言  
 當作王者王必不樂即語言我今總記此中若有好  
 乘者是人當作王時諸王子聞彼所說各自念言我  
 乘好乘時阿育言我乘老宿象我得作王時王又復  
 語師言願更為觀之師復答言此中有第一座者彼  
 當作王諸王子等各相謂言我座第一阿育言我今

坐地是堅勝座我當作王王復語師更為重觀師又  
 報言此中上器上食此當得王阿育念言我有勝食  
 我必作王坐散還宮時阿育母問阿育婆羅門定記  
 誰耶阿育啓言兒當作王老象為乘以地為座素器  
 盛食粳米雜酪是最勝也時婆羅門知阿育當王數  
 修敬其母即便問言誰當作王師言汝生太子阿育  
 是其人也時頻頭羅王邊國恒叉尸羅反王即語阿  
 育汝將四兵平伐彼國及至發引與少兵申時從者  
 白王子言今往伐彼國無有軍仗云何得平阿育言  
 我若應王者兵甲自然來應發是語時尋聲地開兵

支那

釋迦實錄

三

書一



甲從地而出即將四兵往伐彼國時彼諸國民人聞阿育來即平治道路種種供養奉迎王子諸天宣令阿育王子當王此天下汝等勿興逆意彼國即便降伏如是乃至平此天下至於海際時父王得重疾諸臣即便莊嚴阿育將至王所今且立此子為王我等後徐徐當立修師摩為王時王聞此語憂愁不樂默然不對即便命終時阿育心念口言我應正得王位者諸天自然來以水灌我頂素縉繫首尋聲諸天即以水灌阿育頂素縉繫首受王極位人神欣慶又引傳云阿育拜王自鐵輪飛降王閻浮提虛空地下各

四十里鬼神咸皆讚善

阿育王如禮法殞葬父王已即立阿菟樓陀為大臣時修師摩王子聞父崩背立阿育為王心生不忍即集諸兵來伐阿育時阿菟樓陀大臣機關木象又作阿育王像以像騎象安置東門外又作無烟火坑以物覆之阿菟樓陀大臣語修師摩王子言欲作王者阿育在東門可往伐之能得之者自然得作王子即趣東門墮火坑便即死亡阿育王正法治化時諸臣輩云我等共立阿育為王故輕慢於王不行君臣之禮王亦自知諸臣輕慢時王語諸臣曰汝等可伐華



果之樹植於刺棘諸臣答曰未曾見聞却除華果而植刺樹乃至王三勅令伐彼亦不從爾時王即持利劍殺五百大臣王將姝女出外園遊戲見一無憂樹華極敷盛王見已此華樹與我同名心懷歡喜王形體醜陋皮膚麤澀諸姝女輩憎惡王故以手毀折無憂華樹王從眠覺見無憂樹華狼藉在地心生忿怒繫諸姝女以火燒殺王行暴惡故曰暴惡阿育王時阿菴樓陀大臣白王言王云何以手自殺諸臣姝女王今當立屠殺之人即宣教立屠殺者彼有一山名曰耆黎中有一織師子亦名耆黎克惡搥打繫縛男

女及捕水陸之生乃至拒逆父母是故世人傳云克惡耆黎子時王使語之言汝能為王斬諸克人不彼答曰一切閻浮提有罪者我能淨除況此一方王即為作屋舍極為端嚴唯開一門於其中間作治罪之法狀如地獄時彼克人啓王言今從王乞願若人來入此中者不復得出答言如汝所願爾時商主之子厭世間苦出家學道遊行諸國次第乞食誤入屠殺舍中時彼比丘遙見舍裏有火車鑪炭等治諸衆生恐怖毛豎便欲出門克惡即往執比丘言入此中者無有得出於此而死比丘心生悲悔泣淚滿目乞我



少時生命可至一月彼竟不聽如是日數漸減止於七日彼即聽許時此比丘知將死不久勇猛精進坐禪息心不能得道至於七日時王宮內人有人事送付克主將是女人著白中以杵擣之令成碎末時比丘見是事極厭惡此身嗚呼苦哉我身不久亦當如是斷一切結成阿羅漢時彼竟惡人語此比丘期限已盡比丘以偈答曰我心得解脫斷除諸有盡今此身骸無復恪惜爾時彼克主執彼比丘著鐵鑊油中足與薪火火終不然或復不熱克主見火不然打拍使者而自然火火即猛盛久久開鐵鑊蓋見彼比丘鐵

鑊中蓮華上坐生希有心即以啓王王便嚴駕將無量衆來看比丘時彼比丘調伏時至即身昇虛空猶如鴈王示種種變化向王說偈我是佛弟子逮諸漏已盡生死大恐怖我今悉得脫時阿育王聞彼比丘所說於佛法所生大敬信傳云王訪諸臣民臣有及見佛者不唯有波斯匿王妹作比丘尼年百三十餘見佛在世王即往問佛何功德耶尼答曰世尊威神備於經說我時年十歲佛來入宮殿內地皆作金色我即作禮金釵墮地面與光合去後光歇尋之方得又云佛有八種音聲今海邊有鳥名曰羯隨其音哀



亮頗似萬一王求得此鳥旬日不鳴時青衣映鏡嚴莊鳥見其像驚翫欲鳴青衣轉鏡還便輟響王曰若能使鳥鳴者以為夫人青衣即取諸鏡懸於四壁鳥見影顧盼迴惶悲鳴震迅清暢和雅王聞之乃悟起正真道即拜青衣為第二夫人姝女七千人咸皆歡喜

又白比丘言佛未滅度時何所記說比丘答言佛記大王於我滅後過百歲時於巴連弗邑有三億家彼國有王名曰阿育當王此閻浮提為轉輪王正法治化又復宣布我舍利於閻浮提立八萬四千塔佛如

是記然大王今造此大地獄殺害無量王今宜應慈念一切衆生佛之所記大王者王當如法修行阿育王於佛所極生敬信合掌向比丘作禮我得大罪今向比丘懺悔我之所作甚為不善唯願佛子受我懺悔捨心勿復責我愚人譬喻經云時王宮內常以四事供養二萬沙門有外道梵志門徒甚盛忌害沙門欲加凌毀乃選其衆中能幻化者變為異道所奉神名夷摩亘羅一頭四面八目八臂強猛克壯多從醜類先巡邑里次到城門國中男女亡走失魄王下輦却蓋迎之於城門問所欲得鬼曰吾欲噉人若惜民



者諸沙門悉不耕而食費耗滋甚幸可見付以充廚膳王大恐懼遣使報僧時有一沙彌名端正年十三白諸比丘我能降化之即到鬼所而告之曰諸大比丘尋次當來汝欲顯奇可待食竟時從鬼梵志二萬餘人王大設供沙彌斂肴吸饌搖牙而盡尚未充滿因取從鬼以次吞之並隨神足時在祇洹作幻梵志稽首謝過求欲出家悉成沙門後多得羅漢王因此倍加信伏時彼比丘度阿育王已乘空而化時王從彼地獄欲出克主白王言王不復得去王曰汝今欲殺我耶彼曰如是王曰誰先入此中答曰我是王曰

若然者汝先應取死王即勅人將此克主著作膠舍裏以火燒之又勅壞此地獄施衆生無畏傳云王得信心問道人道我從來殺害不必以理今修何善得免斯殃答曰唯有起塔供養衆僧赦諸徒囚賑濟貧乏王曰何處可起塔道人即以神力左手掩日光作八萬四千道散照閻浮提所照之處皆可起塔今諸塔處是也時王欲建舍利塔將四兵衆至王舍城取阿闍世主佛塔中舍利還復修治此塔與本無異如是取七佛塔中舍利至羅摩村中時中諸龍王將王入龍宮中



王從龍索舍利供養龍即分與之時王作八萬四千金銀瑠璃玻璃篋盛佛舍利又作八萬四千四寶餅以盛此篋又作無量百千幡幢繖蓋使諸鬼神各持舍利供養之具勅諸鬼神言於閻浮提至於海際城邑聚落滿一億家者為世尊立塔時有國名著又戶羅三十六億家彼國人語鬼神言三十六億家彼國人語鬼神言三十六億篋舍利與我等起立佛塔王作方便國中人多者令分與彼令滿家數而立為塔時巴連弗邑有上座名曰耶舍王詣彼所白上座曰我欲一日之中立八萬四千佛塔徧此閻浮提意願

如是時彼上座白言善哉大王尅後十五日月蝕時令此閻浮提起諸佛塔如是乃至一日之中立八萬四千塔世間民人興慶無量共號曰法阿育王大阿育王經云八國共分舍利阿闍世王分數得八萬四千又別得佛口二髻還國道中逢難頭禾龍王從其求舍利分阿闍世王不與便語言我是龍王力能壞汝國土阿闍世王怖畏即以佛髻與之龍王還於須彌山下起水高八萬四千里於下起水精塔阿闍世還國以紫金函盛舍利作千歲燈火於五恒河沙水中塔葬埋之後阿育王得其國土王娶夫人身

支那

釋迦譜卷十

九

書十



長八尺髮亦同等衆相具足王令相師觀之師言當  
爲王生金色之子王卽拜爲第二夫人後遂有身足  
滿十月王有緣事宜出外行王后妬嫉便作方便共  
欲除之募覓猪母卽應產者語第二夫人言卿是年  
少甫爾始產不可露面視天以被覆面卽生金子光  
照宮中盜持兒去殺之卽以猪子著其邊便罵言汝  
云當爲王生金色之子何故生猪便取輪頭拍因內  
後園中伏菜王還聞之不悅久久之後王出後園見  
之憶念迎取歸宮第二夫人漸得親近具說情狀王  
聞驚怪卽殺八萬四千夫人阿育王後於城外造立

地獄治諸罪人佛知王殺諸夫人應墮地獄卽遣消  
散比丘化王王發信悟問比丘言殺八萬四千夫人  
罪可得贖不道人言各爲人造一塔塔下著一舍利  
當得脫罪耳王卽尋覓阿闍世王舍利有國相父年  
百二十將五萬人取本舍利王得太喜卽分與鬼神  
各還所部令一日一時同戴八萬四千刹諸鬼神言  
多隔山障不得相知王言汝曹但還治繫護刹安鈴  
我當使阿修輪以手摸日月四天亦同時震鼓便  
舉戴之二經不同故復兩存及迦葉語阿難經云塔  
成造千二百織成旛及雜華未得懸旛王身有疾牀



枕慷慨曰若威靈有感願察我至誠諸塔並列于坐  
隅俯臨王前王手自繫旛以次而去各還其所王體  
羸弊取旛不贍有諸比丘行助王取之故今上旛先  
令比丘將之也由是病愈增算十二故因名為續命  
旛

王已建八萬四千塔歡喜踊躍將諸羣臣往詣雞雀  
精舍白耶舍上座曰更有比丘佛所受記當作佛事  
不我當往詣彼所供養恭敬上座答曰佛般涅槃時  
詣摩偷羅國告阿難曰於我般涅槃後百歲之後當  
有長者子名優婆崛多當出家學道號無相佛王問

上座曰優婆崛多今已出世不上座答曰已出世出  
家學道是阿羅漢住在優留蔓茶山中王聞已歡喜  
踊躍即勅羣臣速辦嚴駕將無量眷屬往詣彼所尊  
者思惟若王來者無量將從受諸太苦殺害微蟲答  
使者曰我當自往詣王所時王聞尊者自來歡喜踊  
躍從摩偷羅至巴連弗邑於其中間開安舟桁於桁  
懸諸旛蓋時尊者優婆崛多將一萬八千阿羅漢眾  
徑至王國王大歡喜踊躍即脫瓔珞價直十萬而授  
與之王將諸大臣眷屬即出往尊者所即為下食五  
體投地向彼作禮長跪合掌而作是言我今領此閻



浮提受於王位不以爲喜今觀尊者踊躍無量如來  
弟子乃能如是如覩於佛時王請尊者優婆喏多入  
城設種種座請尊者就坐衆僧令往雞雀精舍白尊  
者曰尊者顏貌端正身體柔輒而我形體醜陋肌膚  
麤澀尊者而說偈曰

我行布施時 淨心好財物 不如王布施

以沙施於佛

時阿育王告諸大臣我以沙布施於佛獲其果報如  
是云何而不修敬於世尊王復白優婆喏多言尊者  
示我佛所說法遊行處所當往供養禮拜時王將四

兵軍衆及持種種供養香華幡幢及諸妓樂便將尊  
者發去尊者至隆頻林此是如來生處時王五體投  
地供養禮拜卽立佛塔此處菩薩六年苦行此處二  
女奉菩薩乳糜時尊者將王至道場樹下語王曰此  
樹菩薩以慈悲三昧力破魔兵衆得阿耨多羅三藐  
三菩提處時王捨無量珍寶種種供養及起大塔廟  
尊者將王至鳩尸那竭國言此處如來具足作佛事  
畢於無餘般涅槃而般涅槃時王聞是語憂惱迷悶  
躄地啼泣涕零如是乃至興種種供養立大塔廟時  
王復白尊者曰我意願欲得見佛諸大弟子佛之所



記者欲供養彼舍利願爲示之時尊者白王言善哉善哉大王能發如是妙心時尊者將王至舍衛國入祇洹精舍以手指塔此是尊者舍利弗塔王當供養王曰彼有何功德尊者答曰第二法王隨轉法輪時王生大歡喜捨十萬兩珍寶供養其塔次復示大目犍連塔王應供養此塔王復問曰彼有何功德尊者答曰是神足第一以足指踐地地卽震動至於天宮降伏難陀跋難陀龍王時王捨十萬兩珍寶供養此塔次復示摩訶迦葉塔語王言此是摩訶迦葉禪窟應當供養王問曰彼有何功德答曰彼少欲知足頭

陀第一如來施以半座及僧伽黎衣愍念衆生興立正法時王捨十萬兩珍寶供養是塔次復示尊者薄拘羅塔應當供養王問曰彼有何功德尊者答曰彼無病第一乃至不爲人說一句法寂默無言王曰以一錢供養諸臣白王言功德旣等何故於此供養一錢王告之曰聽吾所說

雖除無明癡 智慧能鑒察 雖有薄拘句 於世何所益

時彼一錢還來至王所時大臣輩見是希有事異口同音讚彼嗚呼尊者少欲知足乃至不須一錢



復示阿難塔語王言此是阿難塔應當供養王曰彼有何功德答曰此人是佛侍者多聞第一撰集佛經王即捨百億兩珍寶而供養其塔時臣白王言何故於此布施供養皆悉勝前王白諸臣聽吾所說

如來之體身

法身性清淨

彼悉能奉持

是故供養勝

法燈常存世

滅此愚癡冥

皆由從彼來

是故供養勝

爾時王供養上種種事恒徧至菩提道場樹此樹下如來得阿耨多羅三藐三菩提世間希有珍寶供養之事供養菩提樹時王夫人名曰低舍羅締多夫人

作是念王極愛念於我我亦念王王今捨我諸珍寶至菩提樹間我今當作方便殺菩提樹樹既枯死葉便彫落王當不復往彼可得與我常相娛樂夫人即遣人以熱乳澆之樹即枯燥時諸使人輩白王言菩提樹忽然枯死葉葉變落時王聞是語即迷悶躡地時彼夫人見王憂愁不樂而白王言王勿憂惱我當喜悅王心王曰若無彼樹我命亦無如來於彼樹得阿耨多羅三藐三菩提彼樹既無我何用活耶夫人聞王決定語還復令以冷乳灌之彼樹尋更生王聞歡喜詣菩提樹下觀於菩提樹目不暫捨時王各辦



四寶龕金銀琉璃玻瓈盛諸香乳及諸香湯持種種飲食幡幢寶蓋各有千種及種種華香妓樂受持八支齋布薩著白淨衣服執持香鑪在於殿上向四方作禮心念口言如來賢聖弟子在諸方者憐愍我故受我供養時王如是語時三十萬比丘悉來集彼大眾中十萬是阿羅漢二十萬是學人及凡夫比丘上座之座無人坐時王問諸比丘上座云何而無人坐時彼大眾中有一比丘名曰耶舍是大阿羅漢具足六通白王言此座上座之座餘者豈敢於中而坐王復問曰於尊者所更有上座耶尊者答曰太王佛之

所說名曰賓頭盧是上座應坐此處王大歡喜而作是言於中有比丘見佛者不尊者答曰有也大主賓頭盧者猶故存世王復白曰可得見彼比丘不尊者曰大主不久當見尋當來至王大歡喜時尊者賓頭盧將無量阿羅漢次第相隨譬如鴈王乘虛而來在於上座諸比丘僧各修禮敬次第而坐時王見尊者賓頭盧頭鬚皓白辟支佛體頭面禮足長跪合掌白尊者言見世尊耶時尊者賓頭盧以手舉眉毛視王而言昔如來將五百阿羅漢俱初在王舍城安居我爾時亦復在中又復世尊住舍衛國時給孤獨長者



女請佛及比丘僧時諸比丘各乘空而往彼我於爾時以神力合大山往彼受請時世尊責我汝那得現神足如是我今罰汝常在於世不得取涅槃護持我正法勿令滅也又復如來將諸比丘僧入城乞食時王共二童子沙土中戲遙見佛來捧於塵沙奉上於佛時世尊記彼童子於我滅度百歲之後此童子於巴連弗邑當受王位領閻浮提名曰阿育當廣布我舍利一日之中當造八萬四千塔今王身是也我爾時亦在於中時王白尊者曰尊者今住在何處尊者答王曰在於北山山名犍陀摩羅共諸同梵行僧俱

王復問曰有幾眷屬尊者答曰六萬阿羅漢尊者曰王何須多問今當施設供養於僧食竟使王歡喜王言如是尊者然我今先當供養佛念所覺菩提之樹然後香美飲食施設於僧勅諸羣臣唱令國界王今捨十萬兩金布施衆僧千瓮香湯漑灌菩提樹集諸兵衆時王子名曰拘那羅在王右邊舉一指而不言說意欲二倍供養大衆見之皆盡發笑王亦發笑而語言嗚呼王子乃有增益功德王復言我復以三十萬兩金供養衆僧復加千甕香湯洗浴菩提樹時王子復舉四指意在四倍時王瞋恚語臣曰誰教王子



作是事與我興競臣啓王言誰敢與王興競然王子  
 聰慧利根增益功德故作是事耳時王右顧視王子  
 白上座曰除我庫藏之物餘一切物及閻浮提夫人  
 婁女諸臣眷屬及我拘那羅子皆悉布施賢聖衆僧  
 唱令國界時王上座及比丘僧以千甕香湯洗浴菩  
 提樹時菩提樹倍復嚴好增長茂盛時王及諸羣臣  
 生大歡喜時王洗浴菩提樹已次復供養衆僧時彼  
 上座耶舍語王言大王今大有比丘僧集當發淳信  
 心供養時王從上至下自手供養彼有二沙彌得食  
 已各以麩團麩歡喜丸更互相分王見即笑而言此

沙彌作小兒戲供養訖已王還上座前立上座語王  
 言王莫生不信敬心王答上座無有不信敬心王答  
 上座見二沙彌作小兒戲如世間小兒戲如世間小  
 兒以土團更互相擲如是二沙彌以麩團以麩歡喜  
 丸更互相擲上座白王言彼二沙彌是俱解脫阿羅  
 漢更相奉食王聞是已增其信心而作是念此二沙  
 彌能展轉相施我今亦當於一切僧人施絹劫貝時  
 二沙彌知王心所念二沙彌共相謂言令王倍增敬  
 信一沙彌持鑊授與王一沙彌授以染草王問彼沙  
 彌用作何等二沙彌白王言王因我故施與衆僧絹



及劫貝我欲令大王染成其色施與衆僧時王作是念我雖心念口未發言此二達士得他心智而知我心王卽稽首敬禮衆僧語沙彌言我因汝等施僧衣施僧衣已復以三衣并四億萬兩珍寶觀五部衆觀願已復以四十億萬兩珍寶贖取閻浮提宮人姝女及太子羣臣阿育王所作功德無量如是

雜阿含經云阿育王得大敬信問諸比丘言誰於佛法中能行大布施諸比丘言給孤獨長者最行大施王復問曰彼施幾許比丘答曰以億千金王聞已如是思惟彼長者尚能捨億千金我今爲王何緣復以

億千金施當以億百千金施時王起八萬四千佛塔於彼一一塔中復施百千金復作五歲大會會有三百千比丘用三百億金供養於彼彼衆中第一分是阿羅漢第二分是學人第三分是實實凡夫除私庫藏此閻浮提夫人姝女太子大臣施與聖僧四十億金還復贖取如是計校用九十六億千金乃至王得重病自知命盡王言我常所願欲以滿億百千金作功德今願不得滿足便就後世時計校前後所施金寶唯減四億未滿王卽辦諸珍寶送與雞雀寺中法益之子名三波提爲太子諸臣等啓太子言大王將



終不久今復以此珍寶送與寺中國藏財寶已竭諸國法以物爲尊太子今宜斷之勿使用盡時太子卽勅典藏者勿復出與時王自知索物不復能得所食金器送與寺中太子令斷金器以銀器與王食食已復送與寺中太子又斷銀器給以銅器王亦送與寺中又斷銅器給以瓦器時王手中有半阿摩勒果悲淚問諸大臣今誰爲地主時諸臣啓王王爲地主時阿育王呼侍者言汝今憶我恩養汝持此半阿摩勒果送雞雀寺中作我意禮拜諸僧足白言阿育王問訊諸大聖衆我領此閻浮提閻浮提是我所有今者

頓盡不得自在唯此半阿摩勒果我得自由此是最後檀波羅蜜哀愍我故納受此施令我得福時彼上座告諸大衆誰聞是語而不厭世如佛經說見他衰事應生厭離時彼上座作是念言云何令此半阿摩勒果一切衆僧得其分食卽教令研磨著石榴羹中行之一切皆得周徧時王復問傍臣曰誰是閻浮提主臣啓王言大王是也時王從臥起而坐顧望四方合掌作禮念諸佛德心念口言我今復以此閻浮提施與三寶時王盡書紙上而封緘之以齒印印之作如是事畢卽便無常爾時太子及諸人民與種種供



養送如王之法而闡維之

法益經云王有太子名達摩跋檀那齊言法益是起八萬四千塔日所生也眼可愛如似鳩那羅鳥眼即以爲名焉風姿名雅有文武稱善彈一絃琴王有一別房夫人見而愛之欲與私通太子固辭不從夫人懷恨既深又恐事泄密欲棄之因白王曰當今華裔一化四海同風太子年德俱美文武備通宜可鎮撫邊要以取百姓之心王從其志卽分部兵衆以送太子在鎮甚有治能歲餘王忽徧身患臭天下師藥皆不能治夫人密使人訊訪國內與王病同者破腹看

之得一黑蟲長數寸臭不可近卽取衆藥灌之其臭彌甚又以大蒜熏之蟲死而臭歇於是白王曰妾能治王必使得差願聽我七日爲王王喜而許之曰何有哉夫人卽以大蒜與王令服之便愈於是宮中姝女上酒稱慶令王醉臥無所覺知夫人旣嫌恨太子卽矯勅挑其兩眼令餘人代之國法以王齒爲印乃以蠟模王齒而印之太子奉勅歡喜無怨先挑一眼置掌中有之良久乃悟及苦空無我得須陀洹道然後以一眼與之於是與其妃相携步行出城行人爲之流涕悉仰頭呼天太子有何罪乃致此耶辭拜鳴



咽金不能復起亦有感激致死者乞食流迸過還本國猶持一絃琴在所而彈之時有大臣識是太子亦知夫人所為不敢以聞乃因餘人啓王外有一盲人能彈琴備六十四技變弄殊絕不可不聞王即召之乃見其子子父悶絕墜地良久乃甦即問其故方悟是夫人所為王先受五戒不復殺生唯尖刑之棄於深林太子聞夫人被刑結氣發病而死王年耆昏耄病臥牀褥無復威力半年之中諸臣行事王卒後立位法益之子名三波提紹位也

爾時諸臣欲立太子以紹王位中有一大臣名曰阿

菟羅陀語諸臣曰不得即立太子所以者何大王阿育在時本誓願滿十萬億金作諸功德猶減四億不滿十萬億以是故今捨閻浮提施與三寶欲令滿足今是大地屬於三寶云何而立太子為王諸臣聞已議出四億金送與寺中即便立法益之子為王名三波提

阿育王息法益壞目因緣經云夫人善容及大臣耶奢盜取王印詐為王勅挑王子兩目王後發誓使得眼根神感之應更生淨眼王見瑞應不可稱記脫已寶冠授與法益紹轉輪王治化六年法益治化已經



六年白父王曰乞聽出家王卽聽許令出家學祐按  
阿舍所說不言法益紹位蓋略之耳然則法益出家  
之後其子三波提乃爲太子阿育還領王位者也  
復次太子名毗梨訶西那以紹王位毗梨訶西那太  
子名曰沸沙須摩次紹王位沸沙須摩太子名曰沸  
沙蜜多羅次紹王位時沸沙蜜多羅次紹王位時沸  
沙蜜多羅問諸臣我當作何等令我名德久存於世  
時賢善諸臣信三寶者啓王言阿育祖王在世造八  
萬四千塔復興種種供養此之名德相傳至今王欲  
求此名者當造立八萬四千塔及諸供養王言大王

阿育有重威德能辦此事我不能作更思餘事中有  
惡臣不信向者啓王言世間有二種法傳世不滅一  
者作善二者作惡大王阿育作諸善行今王當作惡  
行打壞八萬四千塔此名不滅時王用佞臣語欲壞  
諸塔寺先往雞雀寺中門前有石師子卽吼王聞之  
驚怖卽還入城如是再三欲壞彼寺時王問諸比丘  
使我壞塔寧壞僧坊比丘答曰二不應行王其欲壞  
者寧壞僧坊殺害比丘如是漸漸至婆伽羅國又復  
唱令若有人能得沙門頭者賞之百金爾時彼國中  
有一阿羅漢化作衆多比丘頭與諸百姓令送與王



令王庫藏財寶竭盡時彼王聞羅漢作如是事倍復  
 瞋恚欲殺羅漢時彼羅漢入滅盡定王作無量方便  
 殺彼聖人終不能得三昧力故不傷其體如是漸進  
 至佛塔門有一鬼神止住其中守護佛塔名曰牙齒  
 作是念我受持禁戒不殺眾生不能害王又復作念  
 有一神名曰為蟲克暴勇健求索我女我不與之今  
 為護法當嫁與彼令其守護佛法時彼蟲神排擯大  
 山推竿王上及四兵眾無不死盡彼王終亡孔雀苗  
 裔於此永終

諸之始本述釋種但塔與阿育故備記孔雀雖於  
 為繁而塔事備矣

釋迦獲八萬四千塔宿緣記第三十二 出賢愚經

爾時佛與阿難入舍衛城乞食見羣小兒於道中戲  
 各聚地土用作舍宅倉庫財寶五穀有一小兒遙見  
 佛來敬心內發歡喜踊躍即取倉中土為穀者便以  
 手探欲用施佛身小不及語一小兒我登汝上以穀  
 布施小兒歡喜報言可爾即躡肩上以土奉佛佛下  
 鉢低頭受土受已授與阿難持此土以塗我房阿難  
 食後以土塗佛房地齊得一徧其土便盡佛告阿難



向小兒緣施此土我般涅槃百歲之後當作國王字  
阿輸迦阿育之別名也其次小兒當作大臣共領閻浮提一  
切國土與顯三寶廣設供養分布舍利徧閻浮提起  
八萬四千塔阿難歡喜重白佛言如來先昔造何功  
德而乃有此多塔之報佛言過去有國王名波塞奇  
典閻浮提八萬四千國時世有佛名曰沸沙波塞奇  
王與諸臣民供養於佛及比丘僧四事供養時王心  
念邊小諸國皆悉偏僻人民之類無由修福今當圖  
畫佛之形像分布諸國咸得供養作是念已即召畫  
師勅使圖畫時諸畫師來至佛所看佛相好欲得畫

之適畫一處忘失餘處重復觀看復次下手畫一忘  
一不能使成時波塞奇調和眾彩手自爲畫一像以  
爲模法於是畫師乃依圖畫八萬四千像布與諸國  
諸小國王皆得供養時波塞奇我今身是以此緣故  
常得三十二相殊特之身般涅槃後得此八萬四千  
諸塔  
祐觀波塞畫像克果法身塔廟之數有若符契法華  
所謂刻畫作像皆成佛道斯其驗矣  
釋迦法滅盡緣記第三十三出雜阿含經  
佛言此摩偷羅國將來世當有商人子名曰掘多掘



多有子名優波掘多我滅度百歲後當作佛事於教授師最爲第一百歲之後優留曼茶山有那吒跋置迦阿蘭若處最爲第一佛作是念我以正法付囑人及天者我之敎法則千歲不動卽告帝釋及四天大王我涅槃後各於方土護持正法過千歲後有非法出閻浮提中惡風暴雨多諸災患人民饑饉觸物磨滅飲食失味珍寶沉沒西方有王名鉢羅婆北方有王名耶婆那南方有王名釋迦東方有王名兜沙羅此四王皆多眷屬殺害比丘破壞塔寺四方盡亂時諸比丘來集中國拘耽彌國王名摩因陀羅西那生

子手似血塗身似甲冑有大勇力又五百大臣同曰生子皆血手冑身時拘耽彌國一日雨血王見惡相卽大恐怖請問相師相師答言王今生子當王閻浮提多殺害人卽因爲名難當年漸長大時四惡王從四方來王大憂怖有天神告言大王且立難當爲王足能降伏彼四惡王便依神言捨位與子以髻中明珠冠其子首集五百大臣香水灌頂令往征伐諸臣之子身被甲冑從王俱征與四惡王共戰殺之都盡王閻浮提治在拘耽彌鞞國佛告四大天王巴連弗國當有婆羅門名曰阿耆尼達多通達比陀經論彼



婆羅門當納妻其妻有娠便欲與人議論卽問諸相師答云是胎中兒當了達一切經論故令母如是月滿生子了達一切經論及醫方教授五百弟子有衆多弟子故名弟子於我法中出家學道達三藏善能說法辯才巧妙攝多眷屬又復世尊告四大天王卽此巴連弗邑當有大商主名曰須陀那其妻有娠便質直柔和無諸邪想諸根寂靜時彼商主卽問相師相師答曰胎中兒極爲良善故令母如是月滿生童子名曰修羅陀年紀漸長於我法中出家學道勤行精進便得漏盡證羅漢果然其寡聞少欲知足及少

知舊居在健陀摩羅山恒來爲難當王說法難當見父王過世兩手抱父屍悲號帝哭憂惱傷心時彼三藏將多眷屬爲王說法王聞法已憂惱卽止於佛法中生大敬信而發聲唱言自今已後我施諸比丘無恐畏適意爲樂而問比丘前四惡王毀滅佛法有幾年歲諸比丘答云經十二年王心念言作師子吼我當十二年中供養五衆種種豐足供施之日天當降雨香澤之雨徧閻浮提一切實種皆得增長諸方人衆皆持供具來詣拘睢彌國供養衆僧時諸比丘大得供養諸比丘輩不修三業戲論過日貪著利養好



自嚴飾身著妙服離出家法形類比丘是法中大賊  
壞正法幢建惡魔旛滅正法炬然煩惱火消正法海  
壞正法山破正法船拔正法樹時天龍鬼神等於諸  
比丘皆生惡意厭惡遠離不復衛護而同聲唱言却  
後七日佛法滅盡號咷悲泣共相謂言至說戒日比  
丘鬪諍如來正法於此而滅諸優婆塞聞諸天言共  
詣衆中諫諸比丘鬪諍至十五日說戒時憍陀摩羅  
山阿羅漢修羅他觀閻浮提今日何處有衆僧欲往  
說戒即詣拘朶彌時彼僧衆乃有百千人唯有此阿  
羅漢修羅他來又復有一三藏名曰弟子此是如來

最後大衆聚集爾時維那行舍羅壽白三藏言衆僧  
已集今爲說波羅提木叉時彼上座答言閻浮提如  
來弟子皆來集此數有百千如是衆中我爲上首了  
達三藏尚不學戒律況復餘者而有所學今當爲誰  
而說戒律爾時彼阿羅漢修羅他立上座前合掌白  
上座言上座但說波羅提木叉如佛在世時舍利弗  
目犍連等大比丘衆所學法我今已悉學如來雖滅  
度今已出千歲彼所制律威儀我悉已備足上座弟  
子聞修羅他比丘自言如來所制戒律我悉備持起  
不忍心有一弟子名曰安伽陀極生忿恨從坐起罵



辱彼聖汝是下座比丘愚癡無智而毀辱我師卽持  
利刀殺彼聖人爾時有一鬼名曰太提木佉作是念  
言世間唯有此一羅漢而爲惡比丘弟子所害執持  
金剛杵以打破彼頭卽便命終爾時阿羅漢弟子見  
殺其師忿恨不忍卽殺三藏爾時諸天世人悲哀啼  
泣嗚呼苦哉如來正法今便都盡卽此大地六種震  
動無量衆生號咷啼泣各各離散爾時拘睺彌王聞  
諸比丘殺阿羅漢及三藏法師心生惋惱諸邪見輩  
競破塔廟及害比丘從是佛法索然頓滅爾時人天  
聞佛所說莫不揮淚

釋迦法滅盡相記第三十四 出法滅盡經

佛告阿難吾般泥洹法欲滅時五逆濁世魔道興盛  
諸魔沙門壞亂吾道著俗衣裳樂好袈裟五色之服  
飲酒炙肉殺生貪味無有慈心更相憎嫉時有菩薩  
精進修德一切敬待人所宗向教化平等憐貧念老  
救育窮厄恒以經像令人奉事作諸福德志性溫善  
不侵害人損身濟物不自惜已忍辱仁和設有是人  
衆魔比丘咸共嫉之誹謗揚惡擯黜驅遣不令得住  
自共於後不修道德寺廟空荒不復修理轉就毀壞  
但貪財物積聚不散不作福德販賣奴婢耕田種植



焚燒山林傷害衆生無有慈心奴爲比丘婢爲比丘  
 尼無有道德姪洩濁亂男女不別令道薄淡皆由斯  
 輩或避縣官依倚吾道求作比丘不修戒律月半月  
 盡徒名講戒獸倦懈怠不欲聽聞抄略前後不肯盡  
 說經不誦讀設有讀者不識字句爲強言是不咨明  
 者貢高求名噓天推步以爲榮貴望人供養諸魔比  
 丘命終之後精神當墮無擇地獄五逆罪中餓鬼畜  
 生靡不更歷無邊恒沙劫罪竟乃出生在邊國無三  
 寶處法欲滅時女人精勤恒作功德男子懈慢不用  
 法語眼見沙門如視糞土無有信心法輪殄沒當爾

之時諸天泣淚水旱不調五穀不熟災疫流行死亡  
 者衆人民勤苦縣官侵剋不循道理皆思樂亂惡人  
 轉多善者甚少日月轉促人命轉短四十頭白裁壽  
 六十男子壽短女人命長七八九十或至百歲大水  
 忽起卒至無期世人不信故謂有常衆生雜類無有  
 豪賤沒溺浮漂魚鼈噉食菩薩比丘衆魔驅逐不豫  
 衆會菩薩入山福德之處惓怕自守以爲忻快壽命  
 延長諸天衛護月光出世得相遭值共興吾道五十  
 二歲首楞嚴經般舟三昧先滅化去十二部經尋復  
 化滅盡不復現不見文字沙門袈裟自然變白聖王



去後吾法滅盡譬如油燈臨欲滅時光更猛盛於是  
 便滅吾法盡時亦如燈滅自此之後難可縷記如是  
 人後彌勒下世間作佛天下太平毒氣消除雨潤和  
 適五穀滋茂樹木長大人長八丈皆壽八萬四千歲  
 衆生得度不可稱計

祐定以方等固知三寶常住常住之法理無興滅與  
 滅之來乃世緣業耳晨離西隱不害千光之恒明也  
 釋迦譜卷第十

音釋

繖蘇旱切 翥章恕切 輟陟劣切 摸音莫 蔓茶蔓母

茶同 桁合浪切 覲初觀切 緘古咸切 泄先結切 迸北  
 都切 斥音 攬他朗切 竿側革切 擯擯必刃切 斥也  
 逐也 尖音 肉推也 切也 擯勅律切 敗也

歸安居士嚴爾珪捐貲刻此  
 釋迦譜卷第十 計字一萬一千四百五十二  
 箇該銀五兩二錢零二分六厘 伏願  
 六根雪淨三障水清即生啓悟妙心世世弘開  
 道眼 龍山釋海瓊對  
 崇禎五年孟春月徑山化城寺識

此譜總計拾卷共字壹拾壹萬零貳千柒佰叁拾  
 肆箇共該銀伍拾陸兩叁錢捌分伍釐整







